


# Arweitsgemeinschaft Flomerschumm:



Hallo, lieve "Gebabbel-Fäns",

die meischt Reagzion zum "Gebabbelhefdel" grigge merr jo als uff unser Breilsrädsel. Dessmool sinn beinoh 80 rischdische Oisendunge oigange. Iss dess nit brima? Merr fräen uns immer, wann uff denne Zeddel noch enn Gruß odder e Gedischl dezugschriwwe iss. So wie vumm Peter unn de Roswitha Magin aus Flomerschemm:

Dess Leesungsword had isch längscht besesse unn dacht, bringscht's glei bei Rupp's vorbei. Isch had's vor lauder Schdress vergesse, hedd's ligge losse bis zum Mai. - Beim Wohnachtsschbaziergang, zwische Fischde, do määnd moi Fraa, ganz owwe uff de Kupp: **"Mänschd isch deed uff den Seggt verzischde? Bring bloos die Leesung noch zum Rupp!"**

Die Doris unn de Berd Dittert aus Frankedahl hänn uns dezugschriwwe: **"... dess Hefdel iss e schäänle Sach; merr märkt, dass die Audore voll hinner Flomerschemm schdehen unn Dradizlone unn Gemoiindeläawe uffrecht halde wollen"**.

Zum Rädsel ausem ledschde Heft hott uns de Walter Wirth e gloores Gedichtl gemacht:

**"Liewer Walter, heer mool her, dess Rädsel war gar net so schwer. Doch ääns devunn war falsch beschriwwe - dess iss merr vunn de Schuul noch hängegebliwwe - e Dier mit ääm Buggel iss doch klar, dess iss halt mool e Dromedar; mit zwää Buggel, geh isch nit fehl, sescht merr Drambeldier odder Kamel."**

Ja, liewer Walter, do hoscht rescht. Isch kännt jetzt äfach saage, isch hett denn Fehler exdra noigemacht, um zu sehe, ob's jemand merkt, awwer isch hab e besserie Ausredd: Weil isch die zwää Buggeldiere schunn immer verwechselt hab, wollt isch ganz sicher gehe unn wollt nogugge. Wie isch dann uffem Wääg zum Lexigoon war, iss merr e Paggung Zigaredde ins Aag gfallle. Do war meer glaar, mid ähm Buggel, dess iss rischdisch. Peifedeggell Isch glaab die vunn de Firma "CAMEL" sinn ah Kamele. Walter Rupp



Was die Arweitsgemeinschaft Flomerschumm (AGF) im Jahr 1999 so alles organisiert unnn uff die Bää gschdellt hott, schdeht im AGF-Johresberischt vumm 1. Vorsitzende Rainer

Hannemann. Awwer weil dess in schäänem Hochdeitsch verfasst iss, häämer dess Ganze e bissel gekerrzt unnn uff Pälzisch umgeschriwwe, dasses in unser Hefdel basst. Dess iss ah gleichzeitisch e guud Beischbiel ferr unser Läser, dasses uns mool ebbes Hochdeitsches zuschiggen unnn meer schreiwens dann uff Pälzisch. **Aller - nerr nit schänniere !!!**



**Am 13. Februar** war de 9. AGF-Massgeball in de TuS-Hall. Schaad iss, dass bloß 140 Besucher kummen sinn. Schäh war´s, awwer´s hänn halt widder jede Menge freiwillische Helfer gfeht.

**De Schdaabausumzug** am 21. März hänn, wie immer, die Leit vumm Kinnergaade brima organisiert. Nooch de Winderverbrennung war in de TuS-Hall noch e Rahmeprogramm vorbereitet.

**Vor de Kerwe** hänn am 17., 19., 24. unnn 26. Augusd sechs Fußballmannschaffde beim Kerwefußballturnier um die Sieg gekämpft. Zwischedurch hänn die Schlachdebummeler uff zwää Lescher in´re Holzwand kigge dirfe. Dess nennt merr Doorwandschieße. Die Kigger hänn ehr Frääd ghatt unnn die AGF-Kass hott ah e bissel wass abgriggt. Am Schluss vumm Turnier hänn sich die "Vädder vunn de Grundschul-kinner" als die beschde Fußballer entpuppt.

**Vumm 28. bis 31. Augusd** war die Kerwe agsaat. De AGF-Arweitsgreis "Lindworm" hott wie immer enn tolle Kerweumzug uff die Bää gschdellt. Dess iss immer de Ufftakt vunn de Kerwe. Die Sonn hott gschoint unnn die Leit hänn ehr Frääd ghatt. Weil jo die AGF die Kabelle beim Umzug bezahlt, waren merr froh, dass durch dess AGF-Gliggsrad unnn e paar Schbender widder wass in die Kass kumme iss.

**Die negscht AGF-Aktion** war im Herbst, am 25. Sebdeember, unser beliebtes "Brodbeidelfesch". Die Kernerbankfraue hääns widder brima organisiert unnn neije Woi ausgschenkt. Besucher unnn Genießer bringen zu demm Feschdel ehr Fudder mit unnn machen dodevunn e großes Büffee. Jeder kann dann vunn Allem esse.

**Dradizionsgemäß** hott am 11. November de Martinsumzug gschdaddgunne. Do iss immer wass los. Merr glaabt gar nit, dasses in Flomerschemm unnn Umgäwung soviel Kinner gibt. Brezle unnn Tee hott´s ferr die Glääne gäwwe unnn Gliehwoi ferr die Große. Bei de Verlosung hänn widder 5 Gäns die Kiehldruh gewechselt unnn ferr die AGF-Kass iss ah e bissel wass hänge gebliwwe.

**Am 5. Dezember** war uffem Kerweplatz de Wohnachtsmarkt uffgebaut. Die Schdänd waren schäh dekoriert, de Grischtbaam hott gschdrahlt unnn enn Haufe Leit hänn sich oigfunne. Ah dodebei häämer ferr die AGF e bissel wass oigenumme, wass merr ferr zukinfdsche Brojegde jo ah dringend brauchen.

**Außer denne Aktion**e hott´s noch etliche Veroschdaldunge gäwwe, bei denne die AGF verdräde war.

*Hannemann/Rupp*

# Zwää neije AGF-Brojeggde

Wie die meischde Flomerschummer jo wissen, organisiert die AGF nit bloß Feschdelscher im Ort, nä do werd ah viel Handfeschdes geleischt. So Sache wie de Gloggeturm, de Zwiwwelbrunne, 's Wabbedoor, die Pergola, die Allee mit de Paadebääm, de alde Baggowwe, de Pawwilljon, 's Gebabelheft oder die Kinnerschbielgeräade fallen nit äfach vumm Himmel. Do missen die Leit vunn de AGF als schunn ganz schäh hielange, bis dess alles soweit iss.

**Unn wär iss die AGF?:** Dess sinn alles Leit, die mit unserm Ort verbunne sinn unn in ehre Freizeit wass ferr die Allgemeinheit due wollen - unn meischdens sinns ah immer die selwe. Dodebei kânt doch vielleicht so manscher, demm Flomerschemm am Herz liggt, bei uns e bissel mithilfe. Do sinn immer Leit willkommen, die uns mit Rat unn Tat unn selbverschändlich ah mit demm "schnööde Mammon" unnerschützen (so wie jetzt grad die Fraa Hartmann aus Villinge-Schwenninge, die uns ferr dess koschdenlose Gebabelheft enn schääne blaue "Hunni" schbendiert hot).

**Pinke-Pinke unn Muschelgraft sinn jetzt grad widder dringend needisch, weil merr nämlisch zwää neije Sache in Agriff nemme wollen:**


1. Die ald Gemeindewoog vunn de Haardtsschdrooß soll imme schääne Glaskaschde vor de Grundschuul uffgschdellt werre. Do kummt e Kubberdäschel druff unn e Beleischung noi unn e Beschreibung werd ah nit fehle, genau so wie e Daafel mit de Name vunn de Schbender. Dodurch werd widder e Schdigg Vergangeneheit ferr die Noochwelt konserwiert.

2. An de Mauer näwer de Schuul wolle merr e Holzscheib vumme alde Eischebaam mondiere, uff der alle wischdische Flomerschummer Daade uffgiehrt sinn (Veroinsgründunge, Ortsvorscheher, usw). Do soll ah e Däschel druff unn e Glasscheib vomedra. An denne Johresring kammer schäh erkenne, wass in de ledschde 135 Jahr bei uns alles bassiert iss.

Wer dodebei - unn ah bei anre Sache - die AGF unnerschütze will, der kann sich gern beim Erschde Vorsitzende **Rainer Hannemann** in Ebbschdää, Weidschdrooß 16, Tel. 50789, Fax: 352766 melde. Wer liewer lwwerweisunge schreibt, demm geb isch ah gern die AGF-Kontonummer: Schdadtschbarkass FT - Nr. 30106, BLZ 545 510 30.

Die AFG bedankt sich im Voraus schunn ganz herzlich!

Walter Rupp



# Achtung, jedzd wennds "nädselhaft"

In dess Rädsel uff de iwvernegschde Seid sinn widder uff die Pälzische Frooge Iwwersetzung e odder annere Begriffe uff HOCHDEITSCH noizuschreibe.

1. Fliggel, Glimberkaschde, 2. nit gladd, 3. Zeiche ferr Sauerschdoff, 4. Feschd, 5. frieher, vorhär, 6. Beschädigung vumme Bischerworm, 7. korz: de Flomerschummer CDU-Ordsvorsitzende, 8. Autozeiche vunn Rumänie, 9. hänn die Schbannier uffern Audo, 10. e Daageszeit (Hei Nuun), 11. e Schmuggschdigg, 12. de 15. im ABC, 13. ganz foiner Dregg, 14. ferr immer unn ..., 15. enn laude Wochedaag, 16. manche gewwen dess immer dezu, 17. Grumbeerbrei, 18. e Woisorrd, 19. arg viel Wasser, 20. wilde Majraan, 21. Eiwedritsche unn Verwandtschaft., 22. de Bund ferrs Lääwe, 23. hääßer Newwel, 24. Vadder unn Mudder, Babbe unn Mamme, 25. kummt aus de Schdegghoos, 26. e leichdes Medall, 27. Bläddsche, Kachel, 28. Aabee, 29. beschdimmdes Gschlechtsworrd, 30. Mucks, 31. e sunnisches Urlaubsland, 32. därres Gras, 33. hänn alle Frankedahler uffern Audo, 34. Firmeschäff, 35. e Daageszeit, 36. Rääs, 37. Grapp, 38. hääßes Gedränk aus gederrde Blätter, 39. Gelänk am Bää, 40. Hilsefrucht mit Knall, 41. enn Schiganebuggel, 42. Zwää Buschdaawe vumm AG-Vorsitzende, 43. läbsch, leis, 44. korzie Arweiderwohlfahrt, 45. Voldreffer beim Boxe, 46. de Bundesbräsidend, 47. Liegesäächer, 48. do kammer durch enn Fluss, 49. Glääbschdoff, Babb, 50. Zoddle am Debbisch, 51. Gerääd zumm Heewe vunn schwerem Zeig, 52. Middesser, 53. Fahrrad ferr Zwää, 54. Ballermann-Eiland, 55. e Dibbelche, 56. nuffer, 57. korz: die Schäffin vumm Kinnergaade in Flomerschemm, 58. de Boss vumm Glooschder, 59. Gemies in Schoode, 60. enn ganz große Voggel, 61. Pannekuche, 62. gadding, 63. macht ausem Ehepaar e Familie, 64. do rennt de Schall sichs Herm wedder, 65. Raubdier im Kinnerzimmer, 66. Schdoggwerg, 67. Feschdschbielort in Tirol, 68. Großvadder, 69. Glooschderfraa, 70. Gawwel, 71. im Johr, 72. enn Blätterbaam, 73. Gloowe, 74. Gosch, Maul, Schnawwel, Rissel, Glabb, 75. uff neideitsche: oigschalde, 76. korz: Tunesie, 77. korz: de Vorsitzende vumm FZB, 78. iss bei Poddsdam und Portugall gleich, 79. Langohr, 80. Brodugt vumm Hinkel, 81. am negschde Daag, 82. Dutt, 83. gläänes Därfel, 84. aldes Geldschdigg, 85. Abkerzung vumm Albrecht Dierer, 86. iss frieher uff de Kerwe immer verglobbt worre, 87. Hornessel, 88. Abkerzung: Tennisclub, 89. Reddich in Bayem, 90. e Benzinmarke, 91. Zahl mit ähner Schdell, 92. enn korze Laschder, 93. Abkerzung: Außer Dienschd, 94. e Raubdier odder e Schdermzeiche, 95. e Kinnerschbielgerät, 96. iss meischd im Geldbeidel, 97. Name vumm DOOF, 98. Diggworzel, 99. Komigger middem schäbbe Aag, 100. Feddre, 101. enn bieblische Käänisch, 102. de Mann vunn de Sau, 103. aus soviel Zwiwwle beschdeht de Zwiwwelbrunne, 104. schieht uff Audos vunn Pinneberg, 105. Wortzelsepp, 106. de 5. Buschdaawe im Alfabeet, 107. Zeiche ferr Fluor, 108. kummt erscht aus de Erd unn dann aus de Leidung, 109. Schdaat in Middelamerika, 110. Päädche, 111. Weed/Wääd, 112. Uffzieg, Fahrschdiehl, 113. jedzder, 114. Weldmääschderschäff, 115. diefes Nochbervolk, 116. Verkehrsmiddel, 117. irgend e Zahl zwische acht unn zeh, 118. Nääwefluss vumm Rhoi, 119. garnit weit weg, 120. de 14. im ABC, 121. Abkerzung ferr: Deitschie Induschdrienorm, 122. e hollännschische Keesesorrd, 123. e Hunderass mit Bambelohre, 124. ganz doll in Form, 125. enn Laxfisch, 126. e Gedreidesorrd ferr Saft zu mache, 127. großer Fluss in de Neh vunn Frankedahl, 128. Zeiche ferr Wasserschdoff, 129. macht Schluss middem ABC, 130. Milchliwwerant, 131. Grankheitskoim, 132. enn Bollidigger aus Oggerschemm, 133. Blugg, 134. soviel Fraue waren vor de Doris schunn "Fraa Schröder", 135. enn Dääl vunn de Bibel, 136. Schdobber, 137. Wutze, 138. Hinkel, 139. Hautschdadit vunn Finnland, 140. Ungam mit ähm Buschdaawe, 141. Planeed, där uns am negschde iss, 142. schäbb, 143. Fluss in Deutschland, 144. Hinnerlossenschaft vunn Hunde, 145. gamit schwer, 146. Gschiss, 147. dohär blooßt enn kalde Wind, 148. e Biersorrd, drieb odder klar, 149. Abkerzung ferr Lidder, 150. enn Noodelbaam, 151. Goggel, 152. gläänes Waldschdigg, 153. Griggsl, 154. Lebkuchegewerrz, 155. korz: de Gläänscht vumm "Rhoihesse-Palz-Duo", 156. Fabriggschomschde, 157. ann dääre Schdell, 158. Buddigg, 159. Digg unn ..., 160. Gäägedääl vunn ja, 161. Ferzbeidel, 162. e Beschde vumm Budding, 163. Boinderschemm, 164. Korz: Sankt Gallen, 165. Europamäschderschaft, 166. Zeiche vunn Minden, 167. Zeiche vunn Solinge, 168. korz: enn ehemoolische Flomerschummer Ordsvorschdeher, 169. Zeiche ferr Natrium, 170. im Alfabeet die Nummer 26, 171. Kerzel vunn unsere Flomerschummer-Rhoipfalz-Reborrdern, 172. Audozeiche vunn Schweede, 173. e Baad an de Lahn, 174. Gumbel, Zinke, Rissel, 175. .... regiert die Weld, 176. de Hut vumme Käänisch, 177. e korzes Gramm, 178. kummt in de Salaad unn in de Moddoor, 179. enn Dääl vunn de Woch, 180. Geld ferrs Wohne, 181. unser ledschdie Behausung, 182. Lohn vumm Angler, 183. enn Ageblig

*Viel Geduld wünscht Walter Rupp*

# Rädselufflesung aus Nr. 8 :

## "WINDERZEIT IN FLOMERSCHEMM"

Beim Bürgerempfang am 9. 1. 2000 hott die lieblich Brinzessin vunn de Zwiwwelburg, Michaela die Erschd, effendlich die 3 Gewinner aus 79 rischdische Leesunge rausgepickt:

1. Pia Baumann aus Birkenheide  
6 Flasche AGF-Gribbelwasser
2. Kay Hauser aus Flomerschemm  
4 Flasche AGF-Gribbelwasser
3. Gerhild Stönnner aus Ebbschdää  
2 Flasche AGF-Gribbelwasser

Meer gradulieren.

Die Deitsche sollen jo e Volk vunn Dischder unnn Denker soi. Awwer isch glaab, in unsre Gegend gibts wennisch Dischder, weil uns kaum jemand enn Beidraag zum Gebabbelheft zuschiggt. Dess iss arg schaad. Meer dehden´s ah gäm ins Pälzische iwwersetze!!! Awwer dodevor hammer mäh Denker, wass jo die groß Beteilischung un denne Rädsel beweist.

Unn weil unser Läser so fleißisch sinn, gibt´s dessmool zur "Belohnung" e ganz großes Greizwordrädsel, bei demm merr widder was "Flissisches" gewinne kann. Außerdem gibt´s noch e "FZB"-Rädsel zu leese.

Wär mitmache will, muss soi zwää Leesunge uff **ZWÄÄ GEDRENDE ZEDDEL** schreibe, uff jedem soin Name nit vergesse unnn bis zum 20. Auguscht 2000 bei´s Ruppe in de Fränsemer Schdrooß 107 abgewwe.




" Wass hoscht dann do ferr e komisches Schbielzeig? "  
" Dess iss e Jo-Jo " - " Jojo !!! "

Isch hett´s jo gar nimmer needisch schaffe zu gehe. Isch  
mach´s jo bloß noch wägem Geld!


Jetzt simmer iwwer de Berg, jetzt gehts berab!

"Babba, do schdeht e Woog!" - "Bu, dess hääßt awwer WAAGE". -  
"Kann isch misch dodemit waage?" - "Nä, Bu, dess hääßt wiege!" -  
" Babba, isch hab misch gewiegt" - "Nä - Bu, dess hääßt gewooge" -  
"Sischt Babba, dann isses doch e Woog !!!"



RUPP  
G-9/00

1	2	3	4	5	6	7	8	9	10	11	12
---	---	---	---	---	---	---	---	---	----	----	----



13	14
----	----

15	16	17	18	19	20	21	22	23	24
----	----	----	----	----	----	----	----	----	----

# E RÄDSEL MIT VIEL FZB

In dem Gschichtl kummen effders drei Werrder hinnemanner vor, die mit F-Z-B / F-z-b / f-Z-B / F-Z-b oder f-z-b afangen. Sie sollen jetzt rausfinne, wie oft dess de Fall iss. Wer die rischdisch Zahl uff enn Exdra-Zettel schreibt unn mit de anner Rädselesung abgibt, demm schbendier isch e "Elwedritsche-Lexigoon" - falls er oder sie als Gewinner(in) gezooge werred. So, ab jetzt geht 's los.

## Viel Gligg wünscht Walter Rupp

E Frankedahler Zoll-Beamtin hott emool im Summer enn freie Daag genumme. "Heit such isch meer e schäänie Frei-Zeit-Beschäfdischung"- hott se gedenkt, "dess iss so rischdisch enn Daag ferr zum Bummle - awwer wann isch in de Schdadt rummdabb, seh isch jo blooß die Frankedahler Zement-Burge - näh, do mach isch liewer e gemiedlisches Piggigg am See.

Also schnell fort zum Bägger, frisches Zwiwwel-Brood gekaafft, dann beim Metzger Ebbes ferr zwische's Brood mitgenumme. Zum Drinke frisches zischisches Bluna, ferr de Noochdisch e Frucht-Zwergge-Baggeed, foine Zuggen-Bläddscher, e paar fridierde Zimt-Banane unn als Obst Feige, Zidrone, Beere oigepaggt. Unn weil se Filder-Zigarede braucht, flink zum Blotze noch e frisches Zigarede-Baggeed in de Frei-Zeit-Beitel unn de Bikini ferr zum Baade unn fünf zarte Badedischer.


Endlich schnappt se ehm Drohtesel mid dem Flick-Zeig-Beitel unn radelt in Richtung Flomerschumm zum Baggersee. Unnerwegs driift se die Christel Müller vunn de Flomerschummer Zwiwwel-Böck. Die frehliche zwää Bekannde flanieren zum Bahnhof unn weil se sich so lang nit gsehe hänn, gibt 's viel ferr zum Babble. Endlich geht 's weider, vorbei an Flomerschummer Zwiwwel-Baure an de See.

Am Wasser hoggen e paar Bekannde ( Fritz, Zabbelfillip, Bernhard ), unn schbielen Kaad. "Faulie Zogger-Bande", ruft se niwwer unn lacht. Die lachen zurigg unn greifen wie uff Kommando flugs zum Bier.

Weider hinne fischen zwää Buuwe unn sie guggt neugierisch in de Äämer. "Na, hab' der schunn wass gfange?" - "Unn ob, Forelle, Zander, Barsch!" - "Unn, wass machener dodemit?" - "Dess sinn alles Fisch zum Bagge". Nääwedra hänn se gäge die Sunn e paar farwische Zelt-Bahne gschbannt. Do hoggt se sich hie unn fangt ziemlich ball a zu verschbre. Sie loßt sich 's schmelge unn irgendwann hott se dess Gfieh, sie hett e Figur zum Blatze, 's iss ehr fascht zum Bresche. Do hilft jetzt bloß noch feschiedie zehrendie Bewegung. Jetzt awwer flott zum Baggersee.

Do ruft ähner vunn denne Buuwe: "Geh weider hinner, hier isses zu flach zum Baade". Grad will se ins Wasser noi, do verschreggt se ganz arg. "Wass iss dann dess ferr e Gegrisch?" - " Feddervieh zwische Bääm" kummt mirrisch die Antwort - "Finke, Zeisich, Blaumeise - awwer jetzt sei ruisch, unser Fisch warn grad ferdisch zum Beiße".

Noochdem se dann iwver fetzische Ziggel-Brogge ins Wasser gegrawwelt iss, schwimmt se schdunnelang im See rumm. Dess kiehle Nass wirkt uff sie wie e Frisch-Zelle-Kur. Sie friert ziemlich bees, awwer sie fieht sich wie nei gebore. Dann ruht se sich noch e bissel aus, liest im Frankedahler Zeidungs-Blatt unn macht sich gemietlich uff de Häämweg. Am Uferrand sammelt se noch e paar schääne Gräser ferr zum Baschdle. Im hinnerschde Egg hubbsen e paar naggische Frei-Zibbel-Baader rumm unn rufen lachend "Floddie Zuggen-Bobb". Iwwern See heert se zum Abschied noch enn fliegende Zebbelin brumme. So, dess war mool enn schääne Daag, äämool e paar Schdunn nit an Flogge, Zaschder, Bimbess gedenkt.





# “Abfahrtd Mannem - Äh Uhr fuchzisch”

odder “Bei Midfahrt Scheidung”

vumm Walter Wirth

Uffem Fasnachdsumzug 1977 in Frankedahl hänn de Münche Bernhard unn isch beschlosse, dass merr mit dem Tandem, dess isch vunn moiner Dande gschenkt griggt hab, beim Umzug in Biel in de Schweiz mitmache wollen. Dort iss die Fasnachd nämlich achd Daag schbeeder als bei uns. Meer hänn uns e Fahrkaad besorgt unn drei Daag vor de Abfahrt hab isch dess Fahrzeisch mit de Bahn vorgschiggt. Moi Marschverpflegung war e Lääbsche Brood, enn Ring Flääschworschd, e Doos Lääwwerworschd, zwää Flasche Woi unn moi Schwessder hott merr nadierlich noch e paar Dambnudle bagge misse. In de Turnhall hab isch misch dann middem Bernhard gedroffe. Soi Fraa, die Fanny, wollt awwer nit, dass de “Lang” mitfahrt unn hot zum gsaat:

“ Wann du mitgehschd, dann loss isch misch scheid!!!” Dess hott die Wirkung ghatt, dass de Bernhard blooß mit meer an de Bahnhof nooch Mannem gfare iss unn meer draurisch noochgewunke hott. Isch hab norre ämool umschdeije misse unn schunn war isch in Biel. Moi Tandem hott schunn uff misch gewaadt. Zuerscht hab isch dann die Beamde hinnerm Schalder zum Friehschdigg oigelaade, wass se ah sofort agenumme hänn. Dodenoch hab isch mein Drohtesel unn moi reschtliche Verpflegung gschnabbt unn bin Rischdung Umzug geradelt. Dort hott merr enn Funkzionäär e Nummer umghängt unn dann isses los gange. In de Mitte vunn moim Rädal hab isch enn riesische Sunneschirm feschg-schraubt, wu druffgschdanne hott: “De schääne Karl vunn Frankedahl grießt die Faschingszunft in Biel”. Der Umzug wahr jo ganz gloor, blooß wollt merr so enn glääner Fregger am Vorderrad die Luft runner losse. Denn hab isch awwer gschdaabt! Korz vor viere war de Umzug ferrdisch, awwer dann hott merr bressiert. Am halwer fünfe iss de Zug in Riehdung Hoimat abgfare. Schnell noch’s Rad uffgäwwe unn oigschdiehe; ’s hott grad so gelangt. Ziernlich kabutt bin isch dann dehääm gelandt.

No drei Woche hab isch dann e Iwwerraschung erlebt: Isch hab enn Brief griggt, wu drinngschdanne hott, dass isch enn Breis gewunne hett. Hämmer die doch tatsääschlich 50 Franke gschiggt. Do hab isch misch awwer riesisch gfräat, dess waren domols an die 75 Mark.

Ebbes hott misch awwer in Biel e bissel gschdeert: Die Gloos. Zwää Griff, zwää Fußdabbe unn im Bodde e Loch. Moi liewer Mann, wannde do nit rischdisch ziele kannscht, do bische beschisse dra.



“Unsern Oba werdd jedzd funfunnachzisch. Der hott jeden Daag e diggie Ziggar geraacht unn iss drotzdem noch fit wie enn Turnschuh”

“Jo, wanner nit geraacht hett, kändler jedzd schunn neunzisch soi !!!”

# 3 wohre, gloore Gschischdelscher

ausem rischdische Lääwe hott uns die  
Marianne Schwarz aus de Unnergass verzeht:

Wie ehn Sohn, de Jürgen, noch enn glääne Bu war, hott sem oigedrichdert, dass merr immer die äldere Leid grieße soll. Irgendwann hott de Mohre Konrad zu ehr gsah, ehn Jürgen wehr jo so enn liewer Bu, där deht immer "gunn Dach" zu ihm sage. Dess hott se ehm Filius verzeht unn där hodd gschdraht iwwers ganze Gsischt.

Korz dennoch hott se de Mohre Konrad wieder gedroffe. "Schwarzen, ehr glaawens jo nit, jetzt sescht eiem Bu sogar "gunn Dach Herr Mohr" zu mehr".

E Familie aus Flomerschemm war emool middem Fahrrad unn zwää Kinner uff de Worschdmarkt geradelt. 's Deschderle hott kää Ruh ghatt unn wollt ubedingt an de Loosbuud wass gewinne. Unn tatsäschlich, sie hott de Hauptbreis griggt, enn ganz,

ganz riesische Teddybär. Dess war e Frääd. Jetzt hänn se halt dess Mordsvieh de ganze Middag uffem Worschdmarkt rummschlebbe misse. Wie se sich uff de Häämwääg gemacht hänn, iss dann awwer erscht 's greeschde Brobläm kumme - wuhie mit demm Ding. Awwer die Leit hänn sich zu helfe wisse. De Vadder hott die zwää Glääne uff soi Rad gepaggt unn die Mudder hott denn Teddy iwwer de Gepäckdrääger ghängt unn feschggegribbelt. Inzwische wars schunn duschder unn sie sinn iwwer Ungschdää unn Erbelsemm widder häämgfahre. Vornenaus de Vadder, hinnenoh die Mudder middem "Bäärle" unn dehinner noch edliche Radfahrer.



Wie am negschde Daag de Vadder in die Fawwrigg kumme iss, hodden enn Kolleg agebatscht: "Heer, meer sinn geschdem Owend ah vumm Worschdmarkt häämgeradelt. Mein liewer Mann, hoscht du awwer enn Schdiewer ghatt. Schämmschd du dich nit, dass doi armie Fraa dich uffem Fahrrad hott häämshlääfe misse?"

Enn Familienvadder aus Flomerschemm war emool middem Rad am Isenachweiher. 's war schunn arg schbeet, wie er häämkomme iss. "Wu warscht Du dann so lang?" hott soi Fraa gfroogt. "Ei, isch bin häämzuus durchs Kondine-Daal gfahre". - "Wu iss dann dess, dess kenn isch gamit?". "Glei hinner Därgemm links näwenoi. Wammer 'snegschdmool middem Audo vorbeikummen, do zeig isch deer's". Wies dann soweit war, do hodder gerufe: "Siescht, Fraa, do schdeht's Schild!" Unn wass hott do uff demm Blagaad gschdanne??:



Die Pia Müller/Bracht aus Därgemm-Seebach hott e ausgefallenes Kucherezept ferr uns uffgeschriwwe; unn zwar gibt dess enn brima

# K E S C H D E K U C H E

## De Dääg:

70 Gramm Zuger, 180 Gramm Budder, 1 Ei unn e bissel Salz schaumisch riehre, dann 250 Gramm Mehl dezuschidde unn schäh vermische. E Torrdeform vunn circa 28 cm Ø mit Fedd odder Budder oischmeere, de Dääg oifille unn verdähle.

## Die Füllung:


250 Gramm gekochde Keschde mit de Gawwel verdrigge (nit middem Zauberschdaab pürriere, merr soll schunn noch die Breggelscher merge).

125 Gramm Budder, 100 Gramm Zuger unn e 1 Pägge Vanillzuger schaumisch riehre unn mit denne vermatschde Keschde vermische. 3 Eiweiß zu Schnee schlagge unn drunnerheewe.

Dess Ganze in die Form kibbe unn im vorgeheizde Baggowwe bei 180 ° e gnabbie Schdunn bagge.

E ¼ Schdunn bevor de Kuche ferrdisch iss, kammern noch mit Eigelb beschdreiche.

In de Zwischezeit kammer jo schunn mool de neije Woi brobiere, denn merr schbeeder zu demm Kuche drinke will. Enn "Guude" !



Die Meiern unn die Millern dreffen sich:

- "Na, Lisbeth, gibts wass Neijes?"  
- "Ajo, unsern Klännschde geht jetzt in die Sonderschuul" -  
"Aller, warum nit, wanners Zeig dezu hott!!"

"Na, wie geht derrs dann so?" - "Wie merr' s nimmt. Guud sehe kann isch schlescht, awwer schlescht heere kann isch guud".

# E leggeres Missverschdändnis

vumm de Helge Rupp

Wie isch emool bei de Helga Wirth agerufe hab um ehr zu sage, dass merr uns widder wägem neije Gebammelheft zammehogge wollen, do war ehr Dochder am Telefon. Isch hab're gsaat, um wasses geht unn sie hott gemäänt, sie deht's re ausrischde. Zum Schluss hott'se noch gfroogt, ob ehr Mudder zu demm Dreffe wass mitbringe soll. "**Nadierlich**", hab isch gsaat, "**wann se wass hott**".



Arweitsgreis "Flomerschummer Gebammel"

Owends kummt dann die Helga mit'rem ganze Kaschde voll frisch gebaggene Quedschekneedel unn Schneggenuudle. "**Was schlääfschd dann Du do alles bei?**", hab isch erschdaunt gfroogt. Dodruff die Helga: "**Ei, Du hoscht doch gsaat, isch soll wass mitbringe!**" Do hab isch awwer lache misse, isch hab nämlich enn Beidraag ferrs Gebammelheft gemäänt unn nit wass ferr de Maage; awwer so war's uns nadierlich ah rescht.

*Komisch, dass immer am End vumm Geld noch soviel Monat iwwrisch iss.*

Die Flomerschummer Arweitsgemeinschaft bedankt sich mool widder recht herzlich ferr denn **koschdenlose** Drugg bei de Firma

## **DREHER-DRUCK**

MIKROFILM-CONSULT GMBH

Hannongstr. 27, 67227 Frankenthal

Tel- (06233)27242 - Fax (06233)27552

Gschdaldung Walter Rupp

Redagzion: Arweitsgreis "Flomerschummer Gebammel" - im Mai 2000